

061.1
Ac 1sm

NOVI
COMMENTARII
ACADEMIAE SCIENTIARVM
IMPERIALIS
PETROPOLITANAE

TOMVS IV.

ad Annum MDCCLII. et MDCCLIII.



PETROPOLI

TYPIS ACADEMIAE SCIENTIARVM

MDCCLVIII.

PHYSICA.

V 13

DE INDICE ELECTRICITATIS
ET DE EIVS VSV IN DEFINIENDIS ARTIFI-
CIALIS ET NATVRALIS ELECTRICITATIS
PHAENOMENIS

DISSERTATIO

G. W. RICHMANNI.

Officium meum in leges naturae inquirendi effecit,
vt octo ab hinc annis in electricitatis phaeno-
mena inquirere, inter alios labores Academicos, ince-
perim. Cum perfectum electrometrum, siue instru-
mentum, quo virtus electrica definitur, ad electricitatis
doctrinam perficiendam absque omni dubio multum fa-
ciat; initio statim cogitavi de commoda ratione defini-
endi virtutis electricae intensiorem. Mihi tamen non-
dum ita felici esse licuit, vt electrometrum perfectum
nactus fuerim, nescio vtrum alii? Relatum mihi qui-
dem est, quendam le Roy in Gallia et d'Arcy adiun-
ctum Mechanices, corpus aquae innatans, per commu-
nicationem electricitatum in vase vitreo, et vicino alio
corpore deriuatiuae electricitatis attractum et eleuatum,
adhibuisse ad electricitatem mensurandam, spatio ad-
scensus gradum electricitatis notante, vtque scala red-
deretur amplior, corporis electricitati extremitatem acu-
tam ita luce illuminare docuisse, vt umbra acutae ex-
tremitatis proiiceretur in tabulam distantem, in qua sca-
la, pro electricitatis gradu mensurando, delineata erat.
Deinde Fräncklin primus electricitatis per acuta corpo-

P p 3

ra

ra ex atmosphaera , fulminea materia grauida , prouocandae auctor , machinulam ex rotulis compositam leuissimis, ex charta crassiori , instar molendini alati , electricitate ad motum concitauit , ad materiae electricae motum ostendendum. Haec forte machina , celeritate circumvolutionis indicis cuiusdam , vim electricitatis mensurare poterit. Nihil tamen de imperfectione et perfectione harum machinarum mihi dicere licet , cum eas nondum adhibere et ne accuratas quidem earum descriptiones videre licuerit. Eo ergo solum indice electricitatis usus sum , qui in Commentariorum Tomo xiv. a me descriptus est , et quem postea emendaui. Mentionem quidem etiam feci , ex percussione campanulae , electricitate factarum , frequentia iudicium ferri posse de virtutis electricae intensione ; campanula tali tamen non usus sum , ad phaenomena electrica definienda , sed solo filo lineo , ad regulam pendulo , de quo nunc quaedam phaenomena electricitatis tam artificialis , quam naturalis , quatenus indice praedicto definita sunt , exponere , phaenomenaque electricitatis explicare constitui.

Indicem electricitatis voco tale instrumentum , cuius ope electricitas cuiuslibet corporis , in diuersis circumstantiis , cognosci potest ita , vt appareat , vtrum nunc sit maior , quam alias ? et quod inseruit legibus electricitatis commode definiendis. Probabile est in vna regione maiorem electricitatem excitari posse , quam in altera. Cel. Muschenbrockio non imitari licuit in Belgio quaedam experimenta electrica , nec mihi hic Petropoli , quae in Germania , Gallia , Italia capta sunt felicissime. De magno autem experimentatore Muschenbrockio per-

suasus

suasus sum, ipsum satis assuetum esse experimentis cum cura et circumspectione instituendis, et occasionem etiam habuisse, machinam idoneam et perfectissimam electricam sibi comparandi. Neque dubitandum est, electricitatem naturalem, in atmosphaera sponte generatam, in vna regione maiorem esse, quam in alia: e re igitur utique erit, instrumentum aliquod adhibere, quod discrimen eiusmodi prodat.

Vtrum meus index aliqualem vtilitatem habeat? ex sequentibus iudicandum est. Ex Tomo xiv. Com-TAB. VIII. mentariorum perspicitur, illum nihil aliud esse, nisi filum lineum AB $1\frac{1}{2}$ pedis Lond. et dimidii grani medicum prope regulam latam verticalem AC, adplicatum et ex suprema regulae parte ad latus angustius pendulum, sub quo quadrans ligneus DEFGH paulo maioris radii, quam longitudo fili est, ita locatur, ut punctum suspensionis fili sit centrum quadrantis et planum quadrantis cum sectione regulae verticali, eaque ampliori, sit in eodem plano. Si talis regula cum massa electricata est connexa, ipsa electricata repellit filum electricatum, quod etiam quadrante ligneo non electricato attrahitur. Tali ratione, quo magis recedit filum a regula, eo maior electricitas excitata sit necesse est.

Cauendum etiam est, ne pinguedo et cera regulae metallica adhaereat, quae efficit, ut filum a regula electricata in eo puncto, ubi cera adhaeret, non repellatur, sed potius retineatur quam tenacissime, indicio certissimo, materiae electricae agitationem in hoc puncto non solum impediri, sed etiam ceram aliam electrica-

citatem obtinere, quae loco repulsionis filum attrahit. Quodsi vero electricitas fortior excitetur ita, ut vis repellens reliquarum partium regulae vim attrahentem ceræ superet, tandem filum a regula recedit. Imo vasculum vitreum, quo regula excipitur, pariter retinet filum, si ab eo contingitur, ut non nisi electricitate fortius excitata filum a vasculo vitreo separetur.

In praedicto indice fili recessus a regula maior, quam antea, filo manente eiusdem longitudinis et ponderis et massa electricata eadem, indicat, uti dictum, maiorem electricitatem, quam antea excitatam fuisse; varique indices sibi similes et aequales, quorum fila sunt eiusdem longitudinis et ponderis, in diuersis locis ad eandem massam electricatam adplicati, ostendunt eundem gradum. Quodsi massae vni electricatae index adplicatus prodit certum gradum, similisque index, aequae longo et aequae graui filo instructus, alteri massae electricatae, et post electricationem a priori separatae, iunctus, eundem ostendit gradum, massae electricatae sese mutuo contingentes nullam scintillam exhibent, et vterque index etiam post contactum eundem respicit gradum, indicio certo aequaliter electricatas esse. Adplicatas tandem indicibus aequae longorum et grauium filorum massis diuersis electricatis et post electricationem separatis, debilitataque vnus massae electricitate quomodocunque, ita ut filum minorem gradum ostendat, quam filum alterius indicis, massae dum sese contingunt, scintillam exhibent electricam, et post contactum massarum index vterque ostendit eundem gradum. Quodsi haec considerentur, patebit, indicem talem idoneum

neum

neum esse instrumentum, cognoscendi cuiusque massae electricitatis gradum electricitatis vel maiorem vel minorem. Obseruandum tamen est, semper eiusdem longitudinis et ponderis filum adhibendum esse. Aliter electricitatis virtus male definitur, et nulla comparatio institui poterit, vnumque filum hunc, et alterum alium, gradum ostendere poterit, virtute electrica eadem cum vtraque massa communicata. Rationem rei non difficile intelligere est: Materiam electricam circa corpus motu quodam agitatum ad certam distantiam cingere debere corpus necesse est, et in minori distantia a superficie corporis maioris efficaciae esse, consequenter crescente distantia certa lege et nobis nondum cognita, decrescere virtutem. Quodsi ergo filum eiusdem longitudinis et ponderis a superficie vnius corporis remoueat ad eandem distantiam, ad quam remouetur ab alio corpore, indicium erit certum, materiam electricam agitatum in aequalibus his distantis efficaciae aequalis esse, et in aliis distantis minoribus aequalibus aequaliter pariter se habere, virtutemque electricam in vtroque corpore esse aequalem. Quodsi vero filum a superficie vnius corporis electricitati remoueat ad distantiam maiorem, quam filum eiusdem longitudinis et ponderis a superficie alterius corporis electricitati, indicium similiter certum erit, efficaciam materiae electricae agitatae in corpore priori in distantia minori et aequali distantiae, ad quam filum a superficie alterius corporis remouetur, maiorem esse, hinc etiam eius virtutem electricam maiorem esse debere.

Fac nunc requisitum boni indicis nihil aliud esse, quam ut ostendat maiorem vel minorem electricitatis

Tom. IV. Nou. Com.

Qq

gra.

gradum, nil desiderari videtur amplius. Sed nemo forte negabit usum indicis ampliorem reddi, si (1) index, applicatus corpori electrificato non efficit, ut electricitas excitata cito pereat, ut nempe lex decrementi electricitatis et constitutio materiae electricae agitatae detegi tandem possit, et si (2) cuilibet massae commode possit applicari ad electricitatis gradum examinandum, quod interdum valde necessarium. Neutrum requisitum in indice descripto inuenitur, electricitas enim excitata valde diminuitur ob arcum ligneum angulis solidis regulae vicinum, quibus forti electricitate excitata in tenebris conus coeruleus electricus cum susurro ex scintilla electrica, in angulis solidis regulae sponte orta, generatus adhaeret: remedium tamen inueniri poterit, uti ex sequentibus adparebit.

Notissimum est phaenomenon electricum, quod modo descripsi, et attente consideranti videtur esse reuera eiectio continua radiorum diuergentium ex corpusculis lucidis constantium, qui quidem ex angulis solidis corporum, quae deriuativae electricitatis capacia sunt, electrificationum, oriuntur; inprimis aliis corporibus deriuativae electricitatis infinitis non electrificatis ita admotis, ut anguli solidi adpropinquatorum non respiciant angulos solidos electrificationum corporum. Quodsi vero anguli solidi acuti corporum sibi obuertantur, in distantia 5 vel 6 digitorum ex angulo solido utriusque, electrificati nimirum et non electrificati, conus multo minor, quam praedictus, cum sibilo erumpit, debiliorique electricitate excitata, lumen extinguitur.

Hic filum sermonis, quod mihi sequendum proposui, parumper relinquam, illuc mox reuersurus; inprimis

primis cum dicenda, ad quaedam, quae sub finem addere animus est, melius intelligenda, facere videantur. Quaeritur, cur lumen conicum in angulis solidis acutis potius et prominentibus corporum partibus oriatur? cur non in superficie plana et curna? cur non in angulis planis? cur ex acuto corpore electrificato, obtuso corpore infinito opposito, erumpat conus magnus electricus, acuto vero obuerso multo minor? Certe quae a nonnullis allata sunt obscuritatem redolent, neque ego nunc rem ita explanare in promptu habeo, ut nihil desiderari possit, sat contentus, si occasionem iis, qui ingenio praestant, dederò aliqualem, rem rite explicandi, conditiones, sub quibus phaenomenon oritur, definiendo.

Verum quidem est, cingi debere corpora electrica, ad certam distantiam, materia quadam subtili agitata: nihil dicam de iis phaenomenis, quae talis materia in ipsis intimis recessibus et porulis corporum, omni sagacitati sese subducens, efficere potest, et ponere fortasse licebit, materiam electricam agitatam occupare spatium circa corpus electrificatum tale, ut extendatur a quolibet puncto superficiei ad aequalem distantiam. Quodsi ergo corpora figuris differunt, et magnitudine etiam, volumina materiae electricae agitatae valde discrepabunt. Nonne etiam discrepantibus his voluminibus actiones corporum electrificatorum, sub eodem electricitatis gradu, discrepabunt? Hoc ex sequentibus experimentis cum magna veri specie concludi posse credidi. Massam ferream superficiei 10''¹¹ \square torum prismaticam impositam vitro adplicui ad massam electrificatam et oriebatur scintilla massa electrificata tacta. Deinde ru-

Qq 2

bum

bum ferreum aequalis massae cum massa prismatica, sed cuius superficies erat 130 digitorum \square torum eodem modo adplicui ad eandem massam, cuius electricitas diminuta erat adplicatione prismatis et maior oriebatur concrepatio et scintilla, et maior etiam indicis mutatio. Etiam per massam aurichalceam ponderis $\frac{3}{4}$ librae et superficiei 700'' \square , magis concrepantem scintillam elicui ex massa minus electrificata, quam per massam aurichalceam duarum librarum, et superficiei 50'' \square ex massa magis electrificata eadem. Certe scintilla posteriori casu efficacior non erat, quam priori casu.

Amplissimus sese hic offert campus, quo stereometriae amatores sese exercere possunt. In prismatibus omnibus rectis, consequenter etiam infinitangulari siue cylindro et etiam sphaera, facile volumen materiae electricae excitatae definiri potest, radio actiuitatis cognito. Est enim istud in prismate recto summa (1) *ex parallelepipedo*, cuius basis integra superficies prismatis, altitudo vero aequalis radio actiuitatis corporis electrificati, (2) *ex prismate*, cuius basis quarta pars circuli, radii, aequalis radio actiuitatis corporis electrificati et altitudo duplum perimetri baseos prismatis, atque (3) *ex cylindro* cuius basis circulus, radii, aequalis radio actiuitatis corporis electrificati, et altitudo aequalis altitudini prismatis, et (4) *ex sphaera*, cuius radius aequalis radio actiuitatis corporis electrificati. In cubo in specie est volumen materiae electricae agitatae summa 1) *ex parallelepipedo*, cuius basis sextuplum quadratum lateris, et altitudo aequalis radio actiuitatis corporis electrificati. 2) *Ex cylindro*, cuius baseos radius, aequalis

lis radio actiuitatis corporis electrificati, et altitudo triplum latus cubi; et tandem. 3) Ex *sphaera* radii aequalis radio actiuitatis cubi electrificati. Vltima pars summae, nimirum *sphaera*, inprimis venit consideranda.

Ad angulos solidos prismatum continentur *sectores* *sphaerae*, radii, aequalis radio actiuitatis corporis electrificati, tribus planis, in quibus sectoribus materia electrica agitata continetur, et summa omnium talium sectorum in prisma est aequalis *sphaerae* integrae, eiusdem radii. In prisma triangulari recto, est hinc volumen materiae electricae, vni angulo solido adhaerentis, sexta pars praedictae *sphaerae*, in prisma quadrangulari octaua pars eiusdem, in prisma quinquangulari $\frac{1}{10}$ pars etc. consequenter in prisma infinitangulari siue cylindro infinitesima pars.

Considerari meretur, eo maius esse volumen materiae electricae agitatae, angulo solido inclusum, quo acutior est angulus baseos prismatis, lateribus baseos inclusus, eo minus vero esse praedictum volumen, quo obtusior est angulus praedictus, si radius actiuitatis ponitur idem. Quodsi nunc ponatur materiam electricam agitaram a corporibus eo difficilius separari, quo in pluribus punctis materia haec corpus contingit, et eo facilius, quo in paucioribus punctis hoc fit, adhaesionem nempe hanc si iusto maior est, impedire, quominus materia agitata a corporibus separetur, et in aliam similem materiam extra corpus incurrat, vt collisione lux oriatur, si vero minor est, separationem et collisionem praedictam non impediri, et hinc lucem per satis notabile interuallum exhiberi, non difficulter videtur conci-

Q 93

pi

310 DE INDICE ELECTRICIT.

pi posse, cur lux continua generetur, si corpus non electrificatum ad corporis electrificati angulum adpropinquet. Materia enim electrica corporis non electrificati quiescens, in locum materiae agitatae et a corpore electrificato expulsa secedere debere videtur, hinc tritus oriri et lux: praesertim si angulo solido corporis electrificati obiiiciatur corpus obtusum non electrificatum, quo casu separatio materiae facilis, et accessus nouae materiae largus esse videtur.

In superficiebus corporum planis materia electrica agitata adhaeret in pluribus punctis corpori, ita, vt non separetur facile: haec fortasse est ratio, cur hoc casu lumen, praedictum, continuum, non oriatur in eiusmodi superficiebus. In omnibus angulis planis materia electrica, quae vni puncto adhaeret, est ita parua, vt prisma infinite paruae altitudinis constituat, cuius basis est sector circuli, radii, aequalis radio actiuitatis corporis electrificati, hinc probabiliter ob paucitatem materiae, talis angulus, lumini praedicto praebendo, par non est. In superficie incuruata cylindri, qui instar prismatis infinitangularis, considerari potest, latera baseos faciunt angulum planum, hinc idem, quod in praecedente casu fieri debet. In angulis solidis prismatum, si adhaeret materia electrica agitata angulis baseos prismatis obtusis valde, volumen materiae electricae agitatae debet esse paruum, hinc per supradicta lumen praedictum non oritur, quod experientiae est. In angulis solidis prismatum acutis aliter se res habet, vt ibi lumen praedictum exhibeatur experientia teste. Quia angulus solidus electricae materiae in cylindris est infinite paruus, propterea

pterea in angulis solidis cylindri non licet sperare lumen praedictum continuum, quod experientia satis notum est. In pyramidibus, quo acutior est angulus solidus pyramidis, eo obtusior est angulus solidus materiae electricae, verticibus pyramidis adhaerentis, et eo maius est volumen materiae electricae ibi agitatae; hinc experientia teste, ex eiusmodi angulis e. g. extremitate siue cuspidē gladii electricati, et extremitatibus foliorum, plantarum electricatarum, hoc lumen exit. Quodsi guttulae aquae parallelepipedo horizontali electricato incumbunt, et admovetur corpus non electricatum, guttulae eleuantur et figuram conicam induunt, verticibus sursum spectantibus, debet ergo per modo dicta lumen praedictum in verticibus exhiberi, quod experientia comprobatur.

Nolim tamen dicere nullo gradu electricitatis excitato non nisi in angulis solidis corporum et partibus procumbentibus lumen praedictum oriri. Ea electricitate, quam ego producere potui, lumen conicum in his tantum exhibere licuit, in aliis non item. Electricitas vero mea, quam Petropoli producere potui, filum indicis descripti ultra 50 gradum hyeme nunquam et aestate vix ad gradum quadragesimum eleuavit. Forte, si eleuari posset multo magis filum, etiam lumen in aliis partibus corporum exhiberetur et totum corpus lumine circumdaretur, quod a *Cel. Basso* obseruatum in eius Commentariis legimus, ubi ei hoc phaenomenon beatificationis nomine insignire collibitum est. Neque audeo dicere ex acutissimo angulo solido lumen conicum maximum oriri, quia ei obtusissimus angulus solidus, electricam materiam agitatam continens, obicitur, et quia volumina

men huius materiae ferme aequale est dimidiaae sphaerae, radii, aequalis radio actiuitatis corporis electrici. Prismatis enim quadrangularis angulus solidus mihi visus est maius lumen praeuisse, quam acutissimus pes circini. Fortasse ex maiori angulo solido etiam largius materia electrica, vel materiam electricam ex parte constituens, erumpit et refarcit decrementum electricitatis magis in hoc loco, quam materia ex angulo solido minori eiaculata, adestque forte hic quaedam compositio rationum ex ratione magnitudinum angulorum solidorum corporis electrici et angulorum solidorum, qui materiam electricam agitaram continent; vbi ex principiis arithmeticis patet, factum oriri maximum, si factores sint aequales, summa manente eadem, quod in dicto casu obtinet.

Consideratio luminis conici electrici forte nos iusto diutius a proposito nostro persequendo detinuit, ad quod nos nunc rursus accingimus.

Dixi cum lumine praedicto decrementum electricitatis eximium coniunctum esse, quod edoctus sum, dum tempus, quo descendebat filum indicis electrici, per certum arcum, annotarem, deinde extremitatem regulae vasculo vitreo exciperem et interuallum inter vasculum et regulam limatura martis vel rasura alius metalli explerem, denuoque excitata electricitate, ut filum eundem gradum ostenderet, quem initio in primo casu, tempus, quo electricitas decrescebat per eundem arcum obseruarem. Tempus enim ultimo casu semper multo maius erat, quam primo, certo indicio electricitatem priori casu decreuisse citius, quam altero. Priori casu etiam filum nunquam ad tantam altitudinem eleuare potui

ac

ac altero casu. Inuat hic monuisse, non necessari-
um esse limaturae martis, vel rasurae alius metalli usum.
Quodsi enim regula fundum vasis vitrei tangit, idem fit;
quin absque contactu fundi decrementum electricitatis
minuitur. Auro etiam obduci potest interior vasculi su-
perficies et regula demitti, donec aurum tangat. Ex
dictis simul satis intelligitur, qua ratione index emendan-
dus sit, ne electricitas cito decreseat.

Observatio decrementi electricitatis, ob angulum so-
lidum corporis electricitati corpori non electricato vi-
cinum, occasionem dat variis cautelis in experimentis ele-
ctricis adhibendis, ad quas in usu indicis cum industria
attendendum est, si phaenomena comparare volumus.

1.) Cum cura cauendum, ne in massa electricata
anguli solidi praesertim acuti occurrant, lumina conica
exhibentes in tenebris: hinc extremitates filorum me-
tallicorum, lucem hanc eiactantes, cera obturavi; qua
re effeci, ut lux in extremitatibus evanesceret. In ca-
tena ferrea adhibita hinc et inde lux illa adparebat in
tenebris, et cum catenam examinarem, in locis illis pro-
cumbentes lamellas acutas offendebar, quibus abrasis lux
cessabat et decrementum electricitatis minuebatur. Dum
circinum massae electricandae imponebam, ita ut pedes
ex utraque parte prominerent, vix electricitas excita-
batur ea, ut ad gradum quadragesimum filum indicis
motu, certa lege retardato, eleuaretur, et a gradu 40 ad
35 cessante tritu vitri electricatorii 86 minutis secun-
dis descendebat, remoto vero circino et electricitate de-
nuo excitata promte filum, motu, certa lege retardato,

Tom. IV. Nou. Com.

R r

ad 50

314 DE INDICE ELECTRICIT.

ad 50 gradum ascendebat, et a gradu 40 ad 35 centum minutis secundis peruenit.

2) Non solum electricitas decrescit cito ob acuta corpora massae electricitatis adplicata, sed etiam si corpora deriuatiuae electricitatis capacia, inprimis infinitae connexionis cum aliis similibus et obtusa, vicina sint angulis solidis corporum electricorum, vel acutis extremitatibus massae electricitatis, et hoc quidem casu citius etiam electricitas decrescit. Quod si enim circini pedi admoventur manus in distantia 5 vel 6 digitorum, massa ad gradum e. g. 40 electricitata, filum admodum celeri motu regulam versus descendere incipit.

3) Possunt duo diuersa corpora aequalia et similia aequaliter electricitata in eodem medio inaequaliter virtutem electricam perdere, vnum citius, alterum tardius; si nimirum vnum versus corpus respiciant admodum acuta corpora, deriuatiuae electricitatis, infinita, in distantia 6 et plurimum digitorum, alterum versus vero non similiter. Ad hoc maxime attendendum est, et omni cura cauendum, ne massae electricitatis corpora acuta, deriuatiuae electricitatis, infinita, vicina sint. Quod si enim pes circini teneatur in distantia 6 digitorum a massa ad gradum e. g. quadragesimum electricitata, filum indicis continuo et celeriter descendere incipit. Quod si vero caput circini, vel aliud quodcunque corpus obtusum massam electricitatis versus dirigatur, tardior filii accessus ad regulam obseruabitur, licet corpus obtusum propinquius admoveatur, quam acutum admotum erat. Eadem res curioso spectaculo confirmatur, si suberis frustum ex filo serico suspendatur prope massam electricitatis. Notum est, illud repelli debere

debere, attractione praecedente. Hoc facto, teneatur in distantia quinque vel sex digitorum a subere circini pes, et accedet statim ad massam electrificatam suber, euidenti indicio, illud electricitatis iacturam passum esse, et adhaerebit massae electrificatae similiter: ponatur dein digitus inter pedem circini et frustum suberis, digitusque adpropinquetur suberi, et accedet suber ad digitum, nempe corpus electrificatum ad non electrificatum. Hoc repetitis vicibus fieri potest.

4.) In medio siccissimo, quantum potest, experimenta electrica sunt instituenda: humidum aerem electricitati officere ab omnibus ferme notatum est, neque dubito genuinam rationem, cur fiat, allatam fuisse, licet mihi non innotuit, si quis fuerit. Si medium est humidum, humiditates a massa electrificata attrahuntur, et non facile separantur, nec repelluntur ob cohaesionem. Quatenus tamen humiditates massae electrificatae adhaerent, nullum decrementum electricitatis oritur, nisi guttulae illapsae aquae, admotis aliis corporibus obtusis infinitis, conicam figuram nanciscantur, et conos lucidos emittant. Decrementum istud oritur potius ob fulcimenta humectata, quae electrificata per communicationem eodem attrahunt humiditates, ac corpora deriuatiuae electricitatis electrificata. Ista humectatio eo promptius fit, quo electricitas efficacior excitatur, et haec est ratio, cur electricitas in frigido conclaui spectatoribus multis praesentibus initio sat valida sit, mox tamen decrescat et interdum cesset. Humiditates enim ex spectatoribus praesentibus per transpirationem insensibilem emissae attrahuntur a fulcimentis corporum electrificatis, quae mutantur in corpora deriuatiuae electricitatis infinita.

R r 2

Con-

316 DE INDICE ELECTRICIT.

Confirmatum fuit hoc egregie experimento, cui occasionem dedit Collega honoratissimus Vir Amplissimus Lomonosow, dum tres portiones vitri, in puluerem diuersae subtilitatis triti, sumsi eum in finem, vt examinarem, vtrum pulueres triti mutarentur in corpora deriuatiuae electricitatis? an suam indolem etiam triti retinerent? Examinaui rem, et vidi corpora iis suffulta electrificari nullo modo potuisse, ne vero humiditates forte adhaerentes in culpa essent, in fornace calefeci valde, et repetito experimento observaui, pulueres hos indolem suam retinuisse, et originariae electricitatis mansisse. Continuata tamen electrificatione, puluis subtilior breuiori tempore in corpus deriuatiuae electricitatis mutabatur, quam pulvis crassior, indicio probabili, puluerem subtiliorem ob superficiem maiorem plus humiditatis eodem tempore atrahere, quam puluerem crassiore. Ne vero aliquis obiceret, calorem in culpa esse, non humorum absentiam, cur vitrum in puluerem tritum originariae electricitatis sit, et frigidum forte perpetuo deriuatiuam electricitatem habere, sequenti ratione rem extra omnem dubitationis aleam posui. Vitri puluerem in phiala vitrea calefeci, et obturaui bene subere collum: suberem perforaui binis in locis, per foramina transmissi tubulos vitreos: per tubulos vitreos traieci fila metallica, donec contingerent puluerem vitri in duobus diuersis locis. Alteram extremitatem vnus filii metallici cum massa electrificata coniunxi, alteram alterius filii metallici extremitatem ligauit cum corpore infinito deriuatiuae electricitatis, et electrificaui massam, calida etiam phiala et puluere, et postea phiala et puluere frigidis: electricitas

viro-

utroque casu insignis excitabatur, quod non fieri potuisset, si pulvis frigidus derivativae electricitatis euassisset. Quo tardius ergo electricitas lagenae Muschenbrockianae decrescit, caeteris paribus, eo siccius debet esse medium, quo lagena circumdata est.

5) Diminuitur electricitas insigniter, regula vel filo metallico lagenae praedictae Muschenbrockianae adplicata ad massam electricatam, et lagena in corporibus originariae electricitatis posita; conseruatur vero, si imponitur corporibus derivativae electricitatis valde capacibus infinitis: filum indicis enim multo celerius descendit priori casu, quam posteriori. Quodsi lagena fundo eius vase metallico armato ponatur in fulcimento sicco vitreo et regula lagenae massam electricatam contingente, gradus electricitatis obseruetur, et deinde tangatur vas, fundum lagenae cingens, continuo electricitas per multos gradus augetur. An hic ex corporibus derivativae electricitatis infinitis materia electrica noua per parietes lagenae electricitate affectos accedat, et decrementum materiae electricae corporis electricati compenset? an vitri crassities impediat accessum huius materiae? an potius motus in lagena praedicta productus vel potius in particulis eius minimis conseruetur, si lagena in metallo collocetur, et citius retardetur, si in vitro ponatur, vel alio corpore originariae electricitatis? dicere non audeo. In sequentibus electricitatem, adplicata lagena Muschenbrockiana productam, vocabo compositam, et sine ea simplicem. In electricitate simplici perpetuo obtinet, corpus electricandum esse suffulciendum corpore originariae electricitatis, si electricitatem suam per notabile tempus

R r 3

fine

318. DE INDICE ELECTRICIT.

sine motu et tritu vitri electrificatorii conseruare debeat. Infinitum siue non suffultum corpus per breuissimum solum momentum temporis electrificatur. Quodsi enim massa vehementer electrificata est, et ceruix, e. g. hominis, non suffulti corporibus originariae electricitatis, et percutientis ferrea virga massam electrificatam, tangitur leuiter ab alio corpore, deriuatiuae electricitatis, infinito, ictum quendam tangens sentit, et inter digitum et ceruicem lumen in tenebris cernere licet, indicio satis certo, electricitatem communicatam esse cum corpore, quod percusserat massam electrificatam. In electricitate composita, si metallum, cum lagenae fundo armato filo metallico iunctum, scintillis electricis percutitur, et metallum istud vel filum tangitur, tremor sentitur et concussio, licet metallum corpus infinitae connexionis sit cum aliis deriuatiuae electricitatis corporibus. Et filum metallicum, dum metallum prouocat scintillam ex corpore electrificato, ipsum reddit scintillam, si tangatur.

Decrescit ergo electricitas massae finitae

- 1) Ob angulos solidos massae electrificatae.
- 2) Ob corpora deriuatiuae electricitatis alia infinita in primis acuta vicina.
- 3) Ob humiditates ad fulcimenta attractas.
- 4) Ob lagenam Muschenbrockianam in corporibus originariae electricitatis positam et regulam eius ad massam electrificatam adplicatam.

Quaeri hic potest: an non etiam ab inaequalitate superficiei, massarum, densitatum et constitutiuarum partium corporum electrificatorum decrementi electricitatis diuersitas ori-

oritur? Ad has quaestiones tamen ob penuriam experimentorum respondere nondum licet. Decrescente vero electricitate minuitur volumen materiae electricae agitatae, dum filum indicis descendit, donec corpus iam nulla materia electrica agitata cingatur amplius, tempusque descensus fili per spatia diuersa definiet forte tandem legem decrementi electricitatis, si modo curua, quam filum facit, et ex curua ratio efficacitatis matetiae electricae in diuersis a superficie corporis distantis definiri possit. Neque difficile est intellectu, hac ratione cognita, indicem mutari in perfectum electrometrum.

Dixi ad perfectionem indicis facere, vt electricitas, eo adplicato ad corpus, quantum potest, conseruetur, et ostendi, quomodo hoc, adhibito indice descripto, obtineatur. Nec silentio praetereundum credo alterum indicis requisitum, vti nimirum commode tolli possit a corporibus electrificatis, et quibuscunque aliis electrificatis adplicari ad gradum electricitatis cognoscendum. Hoc requisito caret, vti facile patet, index descriptus, non tamen ita, vt nullum rei remedium afferri possit. Paucis nunc exponam, qua ratione huic incommodo obuiam iri possit.

Lagenula parua vitrea ABC, colli angustioris et cy-TAB. VIII
lindrica, tenuium parietum, cum limatura martis, ra- Fig. 2.
fura cuiuslibet metalli, vel globulis plumbeis minimis ad
dimidiam altitudinem impleatur, deinde regula metallica
KN immittatur in lagenulam, donec fundum tangat,
ita vt circumdata sit limatura martis, et obtineat verti-
calem situm, atque in collo lagenae bene firmetur
subere,

subere, ne vacillet. Ad extremitatem partis regulae prominentis ex lagenae, quae 12 digitorum sit, ligetur filum tenuissimum KM, certi ponderis, e. g. dimidii grani medici, quod tantum non tangat collum lagenulae. Lagenula immitatur vasi metallico FGBC tenui, arctissime lagenulam contingenti. Vasis metallici altitudo non superet dimidiam altitudinem lagenulae. Cum vase metallico connexa sit ansa GCDE, sustinens arcum circuli ligneum HEI, in 170 gradus diuisum, ita locatum, vt (1) centrum arcus coincidat cum puncto regulae, vbi filum est ligatum, (2) regula continuata supremam arcus extremitatem stringat, et (3) fili linei extremitas inferior lineam vnā ab arcu distet. Vt regula metallica adplicari possit quibuscunque corporibus electricis, firmetur ad extremitatem lamella metallica incuruata LK. Quodsi hoc instrumentum prehensa ansa ad massam electricatam adplicetur, lamella incuruata massam tangente, regula electricabitur, et ob paruam regulae massam, electricitas massae maioris electricatae vix inde electricitatis decrementum patietur, filum a regula repellitur, et gradus arcus circuli, quem versus dirigitur, gradum electricitatis notabit. Remoueat instrumentum et tangatur digito regula ex lagenula prominens, vix aliquid electricitatis residuum erit: adplicetur alii massae electricatae examinandae, quae electricitatem maiorem vel minorem habet, quam prior massa habebat, et filum regulae respiciet alium gradum maiorem vel minorem. Hoc indice mihi nondum quidem vti licuit, attamen minime dubito, illum in multis occasionibus in experimentis electricis commode adhiberi posse; praesertim cum lagenae Muschenbrockianae ele.

electricitatem per aliquot horas conseruet. Quaecunque ergo phaenomena definire licuit, ea definita sunt indice priori.

Propero nunc ad alteram dissertationis partem, in qua phaenomena praecipua, quae indice descripto aliqua ex parte definiui, recensere constitui. Docuit me index descriptus

1.) Corpus tritu excitans electricitatem diuersum esse debere et separatum a corpore recipiente electricitatem, si notabilis electricitas est producenda. Quod si enim ex vna parte vitri electrificatorii homo in resina stans, corpus recipiens electricitatem ex altera parte vitri recte suffultum tangit, siue machina et homo rotam agitans in resina stent, siue non, vix paucorum graduum electricitas in massa electrificanda produci potest, si simplex electricitas excitatur, et si composita electricitas est impertienda massae, nulla electricitas tritu vitri electrificatorii producitur. Aliter se res habet, si corpus recipiens electricitatem ab eo, quod excitat electricitatem, separatum est, et ab hoc non contingitur. Sic enim filum indicis cito eleuatur et scintilla vehemens oritur, si corpora sese mutuo tangunt, neque tali tactu omnis electricitas cessat, sed tantum debilitatur: plurium graduum electricitas residua obseruatur, quae sensim decrescit. Hoc fit siue machina et homo rotam agitans in resina stent, quo casu tamen electricitas difficilius excitatur, siue minus. Vehementia scintillae hic non augetur cum differentia electricitatum, vti alias, sed potius maior esse videtur, si summa electricitatum est maior. An ergo hoc casu particulae electricae materiae

Tom. IV. Nou. Com.

S s

corpo-

corpori excitanti electricitatem adhaerentes contrarium et directe oppositum motum nanciscuntur ei, quem particulae electricae materiae corporis recipientis electricitatem habent, ut actio mutuo occurſu particularum fiat vehemens et ſcintilla concrepans efficax. Idem confirmatur, ſi lagenae vitreae, cylindricae, tenuiſſimorum parietum, qualem Fig. 2. exhibet, ſicciffimae ab homine reſina ſuffulto, vel non ſuffulto, ſicciffima manu leuiſſimo ductu demulceantur quaſi. Virgae enim ferreae, ad quarum extremitates fila linea ſunt ligata, lagenis exceptae, electrificantur ita, ut fila ab iis repellantur, et ſcintillae ex iis concrepantes eliciantur.

TAB. VIII.

Fig. 2.

Obtulit ſe mihi tamen phaenomenon, quod modo dictis repugnare videtur. Particulae argenti viui ſicci, per vitrei infundibuli pariter ſicci paruum foraminulum in lagenam vitream ſiccam tenuium parietum illapſae, et etiam a fundo vel ipſo argento viuo reflexae in parietes lagenae impingentes, producunt collisione ad vitrum electricitatem, quae deriuatur in argentum vivum in fundo lagenae collectum et in regulam ferream, remoto infundibulo ope funiculi ſerici, in argentum vivum per orificium lagenae immerſam: filum enim lineum ex regula pendens repellitur, tactaque regula ſcintillae concrepantes oriuntur. Quodſi vero res bene conſideretur, guttulae argenti viui impingentes in parietes vitreos minime contingunt argentum vivum in fundo lagenae ſtagnans; hinc momento collisionis particulae argenti viui, excitantes electricitatem, a particulis argenti viui, quae recipiunt electricitatem, ſeparatae ſunt. Simul intelligitur in atmofphaera allapſa et collisione par-

particularum deriuatiuae electricitatis ad particulas originariae electricitatis, has electrificari, et electricitatem ab iisdem cum aliis deriuatiuae electricitatis, ad eas attractis, communicari posse. Minime enim dubitandum, originariae et deriuatiuae electricitatis corpuscula in atmosphaera interdum magna copia et ita adesse, vt electricitas produci possit, cum reuera in ea electricitas cum massis rite suffultis communicetur, vti ex sequentibus videbimus.

2.) Deprehendi regula lagenae Muchenbroeckianae indice instructa et electrificata imaque parte lagenae vase metallico armata, si aliquis in resina stans lagenam manu sustentet, et deinde ad regulam alteram manum adplicet, vehementem oriri scintillam et concussionem in vtroque brachio, fere nullam tamen electricitatem post concussionem in regula et in homine obseruari. Filum enim prope regulam ferme ignaum pendet. Phaenomenon detexit *Franklinus*, naturalis electricitatis inuentor, absque indice adhibito, et totalem electricitatis post concussionem extinctionem fieri asseruit, quod ego non obseruavi, sed perpetuo in regula sensibilem electricitatem inueni, manu a regula remota, et lagena armata in corporibus deriuatiuae electricitatis posita. *Franklinus* hic statuit negatiuam electricitatem et positiuam, superficiem lagenae e. g. externam negatiua electricitate et internam positiua electricitate gaudere, et si virtutes tales contrariae aequales concurrant, electricitatem fieri nihilo aequalem. Difficillimus mihi tamen videtur conceptus electricitatis negatiuae, nisi statuatur, vti in mechanicis, motum materiae electricae, contraria directione factum, esse motum negatiuum. An ergo ex vtraque parte

S s 2

lagenae

lagenae, in resina sustentatae, et vibrationes electricas exercentis, materiae subtilis particulae contrario motu agitantur? et hinc, quando sese contingunt, colliduntur aequalibus ferme celeritatibus, directionibus directe oppositis, et ita vehementem concussionem cum totali ferme electricitatis extinctione producant?

TAB. VIII.

Fig. 3.

3.) Edoctus sum indice, alternatim ex vno corpore quasi extrudi posse electricitatem in aliud corpus. Quodsi enim ex vtraque parte lagenae Muchenbroeckianae ABC, cuius fundi externa superficies vase metallico BCDE armata est, in vitreo plano FGHI positae massae recte ex corporibus originariae electricitatis suspensionae KL et MN adsint, indicibus similibus et aequalibus OQXR ac SVUW, et vna massa tangat regulam ZA lagenae Muchenbroeckianae, et altera vas metallicum DEBC lagenam cingens, excitata in vna massa electricitate tritu vitri electricatorii, eadem excitatur etiam in altera, quod indices producant. Quo facto, si tangatur massa KL a vitro electricatorio immediate electricata, perit eius electricitas, et filum OP sese regulae adplicat, et per momentum etiam filum indicis alterius ST se adplicat regulae suae, mox tamen restituitur electricitas in massa vltima MN, quod repulsio fili ostendit. Quodsi nunc rursus haec massa tangatur, filum indicis sese adplicat regulae, et massa ex altera parte lagenae electricitatem nanciscitur, quod filum repulsus ostendit. Hoc sine motu machinae, si electricitas est vehemens, alternatim vel decies fit sine totali electricitatis extinctione. An hic infinitum corpus tollit motum particulis vitri, vel particulis electricae materiae, particulis

particulis vitri adhaerentis, impressum ab vna parte superficiei lagenae, et facit, vt ex altera tantum parte superficiei fiat? An reuera conceditur materiae cui-dam transitus ex infinito corpore in corpus finitum per lagenae parietes electricitate affectos?

4.) Obseruavi, massae maioris electricitatem durare diutius, quam massae minoris, si eodem filo metallico cum vitro electrificatorio iungantur: diuersis enim temporibus filum ad regulam reuertitur. Tempora vero haec nulla ratione obseruata sunt in ratione massarum. Deinde cognoui, massae maiori electrificatae certam massam saepius adplicari posse, antequam tota electricitas exstinguatur, quam minori massae eodem gradu electrificatae, summam tamen massarum, quae maioris massae electricitatem tollit, non esse multo maiorem, quam summam massarum, quae minoris massae electricitatem aufert, consequenter summas has prorsus non esse in ratione massarum electrificarum. An ergo, ob volumen materiae electricae agitatae in maiori massa maius, electricitatis decrementum tardius fit? hoc tum demum inquirere animus est, quando corpora magnae superficiei adhibere licebit eiusmodi, quorum volumina materiae electricae agitatae facile definiri poterunt.

5.) Cognoui hoc indice, commode inueniri posse, quae corpora deriuatiuae electricitatis capacia sint gradu vel maiori, vel minori; si adplicatis iis ad massam electrificatam et per corpora deriuatiuae electricitatis infinita suffultis, tempora accessus fili ad regulam notentur: quo enim minus est hoc tempus, eo magis ea ad corpora deriuatiuae electricitatis, et quo maius est tempus, eo

S s 3

magis

magis ad corpora originariae electricitatis accedere debere facile intelligitur. Hinc etiam cognosci potest ex indice, quae vitra sint optima ad electricitatem producendam. Quodsi enim electricitas excitatur in massa quadam, et notetur tempus, quo a gradu certo ad gradum alium filum indicis descendit, et dein electricitate denuo excitata, et vitro examinando sicco ad massam electricatam applicato, ita, ut ex una parte massa electricata, ex altera parte massa non electricata infinita vitrum contingat examinandum; si notetur rursus tempus, quo ab eodem gradu, quo in priori casu, ad eundem gradum accedit filum indicis, inveniaturque tempus prius aequale esse posteriori, vitrum deprehendetur ad electricitatem producendam idoneum; quodsi vero maius observetur temporis spatium, saltem non ita bonae notae erit ac vitrum, quo excitata est electricitas. Hinc Celeb. *Galabert* detexit, vitra electricitati tritu producendae inepta per communicationem electricata dare lumen fulgentius, quam ea, quae electricitati tritu producendae aptissima sunt. Facile etiam patet, ea vitra maximo cum successu fulcimentis corporum electricandorum inseruire, quae per communicationem difficulter et parum electricantur.

6) Supra iam monui, indicem ostendere, cum differentia electricitatum vehementiam scintillae augeri, si nempe homogeneae electricitatis sint corpora; aliter enim satis vehementem scintillam produci monui, si nulla electricitatum differentia prodatur indicibus, nempe si excitans electricitatem in resina stet, et non connexum sit cum recipiente electricitatem. Cum differentia electricitatum vehementiam scintillae augeri, sequenti ratione experiri

experiri licet. Electrificetur massa electricitate composita, et insistat aliquis resinae, tangatque massam electricatam, scintilla vehemens orietur, et homo ipse electrificabitur, filo parum ad regulam accedente. Remoueat manum idem homo, et rursus adplicet, nulla mutatio indicis neque scintilla obseruabitur, quia corpora aequali gradu electrificata concurrunt. Quo facto, excitetur massae electricitas rursus, donec filum ostendat priorem gradum, et dem homo resinae insistens et minori electricitate praeditus, quam massa electricata, tangat massam electricatam, scintilla erit debilior, quam primo casu, vbi homo non electrificatus massam electricatam tangebatur et homo electricitatem maiorem nanciscetur, quam priori casu habebat. Excitetur tertio electricitas massae, donec idem gradus, qui initio erat, filo notetur, et idem homo resinae insistens, minori gradu electricitatis praeditus, tangat massam electricatam, aliquanto minor scintilla orietur, quam praecedentibus casibus, et homo maiorem rursus electricitatem habebit, quam antea, differentiaque electricitatum inter electricitatem massae initio excitatam et hominis minor minorque euadet; hoc continuari potest, donec differentia electricitatum fiat aequalis nihilo, quo casu nulla scintilla oritur. Tali ergo ratione satis patet cum differentia electricitatum scintillae vehementiam decrescere. Vltimae enim scintillae ita paruae et debiles sunt, vt non nisi in tenebris attente consideranti appareant.

7.) Simplici electricitate fluida inflammabilia non nisi calefacta accendere potui; composita vero electricitate, si filum ostendebat gradum trigesimum, spiritum vini

re-

rectificatum et Petroleum temperiei 75 graduum Therm. Far. vnica scintilla accendere licuit, vase nimirum metallico, cui infusus erat liquor accendendus, iuncto cum fundo lagenae armato per filum metallicum, et corporis electrificati accendentis electricitate a superficie liquoris duas lineas distante. Poterunt hinc particulae inflammabiles in atmosphaera telluris natantes, scintillis electricis, si quae in illa generentur, accendi.

8.) Vapores aqueos subtilissimos non deriuare electricitatem sensibilibiter, sequenti ratione expertus sum: Vapores aqueos ex Aeolipila emissos in massam electrificatam direxi, Aeolipila cum aliis deriuatiuae electricitatis corporibus, non suffultis corporibus originariae electricitatis, connexa, et fili directio non mutabatur sensibilibiter. Neque vapores ex Aeolipila electrificata emissi electricitatem cum aliis in resina positis sensibilibiter communicarunt. Limatura martis mixta cum massa aequalis ponderis ex cera et resina facta, et massa hinc formata cylindriciformi, adplicata ad massam electrificatam manu, filum indicis non vidi notabiliter descendere; vnde iudicauimus, corpora deriuatiuae electricitatis, nisi sint contigua, non tollere electricitatem massae electrificatae sensibilibiter; vnde nec vapores subtilissimi in aere hoc efficere poterunt. Intelligi ergo potest, cur corpora deriuatiuae electricitatis, originariae electricitatis corporibus suffulta in atmosphaera, vaporibus grauida, electrificari possint.

9.) Inter plura corpora vna serie sese excipientia successiue interuallo temporis breuissimo scintillas concrepantes plures generari, sequenti experimento edoctus sum: Impressi massae ex cera cum resina mixta clauu-

clauulos cum capitulis aurichalceis in distantis a se mutuo minimis e. g. vnus quartae partis lineae, arbitraria serie, literam quandam vel aliam figuram repraesentante dispositos, et cum altero extremorum clauulorum ligauimus filum metallicum tenuissimum cum fundo lagenae armato iunctum, cum altero vero filum metallicum simile cum massa electricata connexum. Electricitate deinde excitata tanta, vt filum quadragesimum gradum ostenderet, iucundo spectaculo inter quemlibet clauulum scintilla cum concrepatione exhibebatur. Dum enim clauuli omnes sibi mutuo vicini electricantur praeter vltimum, qui corpus derivatiuae electricitatis infinitae connexionis est, inter clauulum hunc vltimum et ei vicinum debet oriri scintilla; ita vero clauuli vltimo proximi electricitas perit: oriri ergo debet inter hunc et ipsi vicinum noua scintilla, et rursus noua inter hunc et sequentem, etc. donec omnes scintillae vsque ad clauulum vltimum generentur. Absoluitur vero hic successiuus scintillarum ortus breuissimo temporis spatio; hinc non mirum est, vt figura ex punctis lucidis ea serie se excipientibus, qua clauuli dispositi sunt, constans, repraesentetur. Quod si continua lux desideretur: aliud quodcunque corpus derivatiuae electricitatis infinitum clauulo adplicetur filo metallico, a fundo lagenae Muschenbrockianae ducto, remoto. Serpentinum fulminis ductum simili ratione variis nubibus electricatis concurrentibus generari concipi poterit. Index ostendit

10.) Vacuum ab aere spatium in tenebris lumine electrico facile impleri, quod sequenti ratione observari poterit. Tubum Torricellianum phosphorescentem tabulae
 Tom. IV. Nou. Com. T t lignae

lignae adplicatum, quae ex serico funiculo suspensa erat, electricitate composita electrificauit, argento viuo cum massa electrificata, per filum ferreum, per lumen inferius tubi sursum hians mercurio immersum, iuncto, ita ut filum ferreum ibi, ubi ingrediebatur tubum, lineam a tabula lignea distaret. Dum electricitas excitabatur, continua in vacuo tubi fulgura et mutum lumen absque omni mercurii oscillatione oriebantur in tenebris, cessanteque vitri electrificatorii motu, tacta tabula, quae inter tangendum lumen praebebat, aliquoties adhuc provocabantur. Quodsi vero non tangebatur tabula, interdum sponte vel centies oriebantur fulgura in vacuo, interuallo temporis inter duo fulgura interdum centum minuta secunda superante. Quin tacta massa compositae electrificata, et indice gradum nullum ostendente, lumen interdum in vacuo tubi sistitur, indicio certo, nondum electricitatem massae prorsus extinctam, sed residuam esse, quae vacuo tubi Torricelliani illuminando sufficiat. Simpliciter electricitate fulgura in vacuo pariter producuntur, sponte tamen finito vitri electrificatorii motu rarius apparent. Nonne etiam fulgura in rariori aeris regione absque infrequenti Tonitru debili electricitate oriri poterunt? nonne item aurorae boreales? Index docuit porro

II.) Electricitatem catenae Longit. 66 pedum Lond. et ponderis 9 librarum hyeme decreuisse a gradu 45. ad gradum 0 quatuor horis, aestate vero electricitatem celerius exstingui. Speraui etiam, me aliquam legem decrementi electricitatis ope huius indicis stabilire posse. Hunc in finem obseruaui tempora descensus filii massae

ele-

electrificatae certo gradu et gradus descensus. Initio videbar mihi obseruare egregiam harmoniam, ast postea repetito saepius experimento minime. Hoc solum animaduerti, filum motu, certa lege retardato, accedere ad regulam. Docuit index

12.) Massam quandam cum acuta extremitate rite suffultam in vicinitate corporis a globo electricatorio immediate electricati, ita, vt acuta extremitas corpus electricatum versus dirigatur, et ab eo plures digitos distet, electricari. Sensim sensimque enim filum indicis tali massae adplicati ascendit. Quodsi tollitur electricitas corporis immediate a globo electricati, etiam sensim massae cum acuta extremitate electricitas languescit. Phaenomenon hocce et varia praecedentia ducunt nos ad naturalem electricitatem considerandam, quae phaenomenis allatis perpenfis, quomodo generetur, non diffcultur intelligitur.

Electricitas haec naturalis nouissime detecta nostra contemplatione dignissima est. Oriri videtur in atmosphaera collisione particularum deriuatiuae electricitatis in corpuscula originariae electricitatis, quae hac ratione electricata cum aliis deriuatiuae electricitatis corpusculis, nubes multitudine constituentibus, electricitatem communicant. Philadelphiae in America praedictus *Franklinus* sagacissimus inexpectati phaenomeni proditor fuit, et nunc de rei veritate obseruationibus passim in Europa euulgatis prorsus non dubitare licet, quilibetque, qui ferrum acutum ex serico funiculo suspendere valet, vel vitro et resina fulcire, de illa conuinci poterit. Suspicius quidem erat iam anuo 1735 Cl. *Gray*, qui inter primos

T t 2

et

et præcipuos Phaenomenorum electricitatis inuestigatores locum habet; lumen et ignem electricum naturam fulminis et tonitru habere, et Cel. Vinckler Lipsiensis tractatum edidit anno 1746, in quo idem demonstrare laboravit. Imo observationes quaedam remotissimis ab hinc temporibus sagacitatem naturalis scientiae cultorum præcefferunt. *Iulius Caesar* de bello Africano Cap. 47. describit tempestatem quandam, *nimbum cum saxea grandine subito esse exortum; et pilorum cacumina arsisse* referens. Verisimile admodum videtur, atmosphaeram electricatam cum cacuminibus pilorum communicasse electricitatem, ut iis lumen conicum caeruleum continuum adhaereret, quare ardere visa sunt. Huc etiam pertinere videtur locus *Liuii* Lib. XXII. Cap. 1. ubi dicitur, in Sicilia militibus aliquot spicula, et in Sardinia in muro circumeunti vigilias, equiti scipionem, quem manu tenuerat, arsisse. Principem locum, qui huc pertinet legimus in *Senecae* Naturalium quaestionum L. 1. ubi scribitur: *In tempestate magna apparent quasi stellae velo insidentes, adiuuari se tunc periclitantes existimant Castoris et Pollucis numine.* Deinde: *Gylippo Syracusas petenti visa est stella super ipsam lanceam constitisse.* In Romanorum castris visa sunt ardere pila ignibus scilicet in illa delapsis, quae saepe fulminum modo animalia ferire solent et arbusa, et si minore vi mittuntur defluunt tantum et insidunt, non feriunt nec vulnerant. Hic ignis forte concrepans electricus ab igne continuo cum suffuro discernitur, ille enim percutit et vulnerat, hic nullo modo.

Si-

Similis observationis nostris temporibus mentio facta est in nouis publicis: nimirum Academiae Parisinae relatum esse, crucem turri templi Plauzatenfis in Gallia impositam ferream, cuius finis repraesentant flores lilii extremitatibus acutissimis, tempestate densissimis nubibus et frequentia fulminum terribili conspicuam esse ita, vt iuxta quamuis extremitatem lux appareat, traditioneque bene longa 27 annorum constare, rarissime fulmine damnum afferri vrbi et locis vicinis, si prope crucem lumen praedictum appareat. Idem ergo, quod remotissimis temporibus obseruatum est, etiam recentissimis confirmatum videmus. Simili etiam confidentia praediti esse videntur ciues Plauzatenfes, ac nautae remotissimis temporibus, erant, qui, dum in tempestate lumina velis infidentia obseruabant, adiutos se existimarunt. Nullum est dubium, si observatio ciuium Plauzatenfium haec est vera, crucem turris Plauzatenfis ab atmosphaera electrificatam corporibus originariae electricitatis suffultam esse.

Non minus afferri huc meretur illud, quod Cel. *Muschbroeckius* Exp. 106. in Diss. de magnete scribit; nimirum aliquoties annotatum esse, fulmen prope Versbrium delatum huius directionem prorsus immutasse, ita vt locus septentrionalis euaserit australis. Anno 1736 die 24 Iulii Vltraiecti Batavorum obseruatum erat declinationem auctam fuisse 10. minutis, et a Cel. *Krafftio* Tubingae an. 1745 die 31. Aug. observatio notata confirmata, dum declinatio acus inter tonitrua et fulmina 15 min. diminuta fuit. Quantum mihi constat, scientiae naturalis amatoribus tunc temporis defuit

fragacitas perspiciendi, vel potius nondum ausi sunt asserere, eiusmodi variationem acus magneticae electricitati in atmosphaera productae deberi, quod mihi quidem nunc verisimillimum est. Acus enim magnetica ordinarie fulcitur theca lignea sicca, et lignum siccum inter corpora originariae electricitatis, saltem inter corpora derivatiuae electricitatis minori gradu capacia, locum habet. Dum ergo inter fulmina, observator declinationis acus se adpropinquare debet acui, fulmine electricatae, attrahere debet acus extremitatem vicinior; hinc acus directionem naturalem deferere debet, nisi observator exacte in plano isto stet, in quo acus naturaliter quiescit. Hic boni publici causa subiungere liceat, quomodo effici possit, ut acus magneticae directio in naui, inter fulmina et tonitrua vel electricitate naturali, non turbetur. Filum metallicum quodlibet praeter ferreum connectatur cum stylo acuminato, qui sustentat capitellum aurichalceum acus, et ducatur ita, ut altera extremitas fili metallici contingat aquam. Tali ratione acus mutatur in corpus derivatiuae electricitatis capax infinitae connexionis cum aliis similibus, et electricari haud potest ita, ut electricitas per notabile tempus conservetur, consequenter nec directionem suam relinquere poterit, corpore non electricato alio accedente.

Electricitas haec naturalis certe ita comparata est, ut non mirandum esset, si nonnulli attoniti magis et ancipites insolitum hoc phaenomenon contemplantur, quam ut de circumstantiis phaenomeni definiendis solliciti essent. Posset enim alios horror quidam naturalis, alios metus ab educatione generatus, ab alteriori inquisitione deter-

detertere. Hinc illae quaestiones oriuntur : vtrum observationes eiusmodi absque periculo institui possint? et annon a corporibus materia fulminea electrificatis tremendus fulminis effectus produci, et periculum imprudentissima arte adduci possit? Iste horror et metus, si auferri potest, certe non aliter fiet, nisi vt ostendatur, observationes eiusmodi absque periculo institui posse, et remedium afferri, si periculum adsit. Hoc vero, si remedio res non careat, efficere nemo poterit, nisi qui multis antea observationibus et experienciis edoctus fuerit, cur et quibus sub circumstantiis fulmen periculosum euadat. Patet ergo dari his nouissimis temporibus etiam Physicis occasionem, qua fortitudinem quandam ostendant, et in re ancipiti audaciam. Hinc cum mei officii sit in res naturales, quantum in me est, inquirere, nihil me ab observationibus eiusmodi abduxit; hinc nullam occasionem omisi, qua electricitatis naturalis phaenomena non solum obseruare, sed etiam aliquatenus definire liceret. Iam anno superiori expertus eram sine indice idoneo, effectum electricitatis naturalis. Hoc anno vero omnia praeparavi, vt sub determinatis circumstantiis phaenomena contemplari possem.

Elegi catenas duas ferreas longitudine 66 ped. Lond. et ponderis 9 librarum. Vtriusque catenae extremitatem alteram ex fune serico ad altitudinem 40 circiter pedum Lond. super superficiem fluuii Neuae suspendi, et omnia ita instruxi, ne pluuia humectarentur funes serici, et vti catenas commodè dimittere et eleuare possem: alteram extremitatem debita cautione in conclaue, vbi observationes instituere volebam, duxi, et fune serico cum clauo parieti

parieti, infixo iunxi. Catenae utrique adplicui indicem aequalem. Vnius catenae extremitati virgam ferream cum acuta extremitate coniunxi, obseruauique

1) Electricitatem maiorem communicatam cum catena, cui virga cum acuta extremitate erat coniuncta, quam cum altera. Catena absque virga acuta propter domicilium, super cuius tegmine ex palo suspensa erat, in variis aedificii partibus ad funiculos sericos alligata erat, ut hinc et inde anguli orirentur. Ne ergo obijci posset, non obtusam extremitatem in culpa esse, sed directionis multiplicem mutationem, cur hoc casu electricitas debiliior orta sit, quam eo, cum catenae superioris extremitas cum virga ferrea acutae extremitatis coniuncta erat, alia occasione virgam cum acuta extremitate a catena, cui adplicata erat, remoueri, et cum altera coniunxi, cuius extremitas antea obtusa erat. Euentus autem observationis erat idem, qui ante, et rursus catena cum obtusa extremitate electricitatem debiliorem nanciscebatur. Suborta est suspicio noua, nimirum differentiam altitudinum paruum in culpa esse posse, cur discrimen praedictum adsit; hinc catenam cum virga acuta de industria ad paulo minorem altitudinem dimissi, et nihilominus electricitas huius catenae maior obseruabatur, quam alterius. Acutum corpus citius electrificari, quam obtusum ex artificialis electricitatis phaenomenis satis intelligitur. Quodsi enim corpus acutum recte suscitum volumini materiae electricae agitatae corporis arte electrificati immersum est, et cum acuta extremitate corpus electrificatum versus dirigitur, electricitas corporis electrificati decrescit, et corpus acutum propinquum electrificatur.

Quodsi

Quodsi cum obtuso corpore idem fit, electricitas corporis electrificati tardius decrescit, et corpus obtusum difficilius electrificatur. Hinc non dubitandum, virgam ferream acutam recte suffultam corporibus originariae electricitatis et atmosphaerae electrificatae expositam immerfam esse volumini materiae electricae agitatae, quae nubem electrificatam virgae vicinam cingit.

2) Obseruavi catenae electricitatem non augeri ob eius longitudinem. Adhibui 130 pedum Lond. catenam; electricitas tamen non erat maior, quam catenae 66 pedum.

3) Vidi, electricitatem naturalem manere interdum integram per quartam ferme horae partem, licet saepius interea temporis tangeretur catena; et Vir Amplissimus Lomonosow obseruauit sine omni tonitru et fulmine electricitatem insignem communicatam esse cum ferro recte suffulto.

4) Dum tonaret, electricitatem productam vidi diminui et interdum cessare, ita, vt filum indicis regulae adhaereret. Hoc etiam Berolini a Cels. Ludolffo obseruatum est praecedenti anno, et quidem electricitatem proxime ante fulmen fuisse maximam et fulmine producto diminutam, interdumque prorsus extinctam. Obseruauit

5) cum ipso fulmine et tonitru electricitatem catenae ortam esse, et post fulmen et tonitru subito minutam: dum hoc fieret simul notauit, decrescere electricitatem catenae crescente numero minutorum secundorum inter fulmen et tonitru. Cum enim numerus minutorum secundorum erat 6, filum respiciebat 30. gradum, cum

Tom. IV. Nou. Com. V v erat

338 DE INDICE ELECTRICIT.

erat 9, filum notabat 25. gradum, cum erat 11. filum prope 20. gradum erat, et cum tandem erat 14, filum haerebat circa 10. gradum.

6) Electricitatem cum ipso fulmine et tonitru productam post fulmen et tonitru auctam esse.

7) Inter fulmina splendidissima absque tonitru, quae spatio duarum horarum sat frequenter sese excipiebant, nullam electricitatem cum catena communicatam esse, et filum indicis iners regulae adpressum mansisse. Simulac vero tonare incipiebat, eo ipso momento filum indicis ad gr. 25 eleuari, et deinde sensim rursus descendere.

8) Maximum gradum, ad quem naturalis electricitas filum indicis eleauit, fuisse 30 graduum.

Potest ergo 1) absque omni tonitru et fulmine catena electricari, et electricitas haec per multa minuta eadem virtute manere. Potest 2) cum ipso fulmine et tonitru electricitas catenae minui vel cessare, et proxime ante fulmen maxima esse. Potest 3) cum fulmine et tonitru electricitas catenae oriri, et deinde vel per multa minuta in eadem virtute persistere, vel fulmine facto subito rursus diminui, vel cessare Tandem 4) non videtur repugnare inter fulmina et tonitrua saepius nullam electricitatem produci. (*)

Ponas enim catenam nondum esse electricatam, potest 1) virga ferrea cum acuta extremitate nubes electri-

(*) Post dissertationem hanc Academiae traditam contigit mihi electricitatem naturalem die 11 Iulii obseruare; et suspicionem notatam ipsa experientia confirmatam videre. Dum enim inter fulmen et tonitru 8 min. sec. numerarem, filum indicis respiciebat gradum 25, dum numerarem 24 min. sec. debilis valde electricitas erat, et dum 40 min. sec. numerarem, electricitas nulla obseruabatur.

electrificatae volumini materiae electricae agitatae immersa esse; quo casu necesse est, ut virga ferrea absque omni fulmine et tonitru electricetur, si nimirum nulla nubes maiori vel minori gradu electricata ad nubem illam accedit, cuius volumini materiae electricae agitatae virga ferrea immersa est, quo facto scintilla concrepans et inflammabilibus materiis praesentibus inflammatio, et interdum etiam tonitru observari deberet. Ita enim artificiali electricitate electricatur virga ferrea, si recte suffulta est et sphaerae actiuitatis corporis electricati immersa, sine omni scintilla concrepante praecedente: neque mirandum est hoc casu filum indicis per insigne temporis intervallum ostendere eundem gradum.

Potest 2) eadem virga ferrea extra sphaeram actiuitatis nubis electricatae existere; quo casu nullam electricitatem filum indicabit. Ponatur autem

3) adpropinquatione diuersarum nubium inaequaliter electricatarum oriri scintillam concrepantem, et inde fulmen et tonitru, potest hinc subito augeri radius sphaerae actiuitatis nubis, uti virga ferrea eius sphaerae actiuitatis immergatur, et ita subito potest electricitas oriri. Hoc posito si medium est siccum et originariae electricitatis, quod catena electricanda contingit, potest electricitas per aliquod temporis spatium in eadem intensione persistere. Quodsi vero medium est humidum, et ita adpropinquat ad indolem corporum deriuatiuae electricitatis, possunt fulcimenta catenae facile humectari, et ita tota catena breui in corpus deriuatiuae electricitatis infinitum mutari; vnde non mirum, si electricitas catenae subito decrescit. Potest vero etiam radius

V v 2

sphae-

sphaerae actiuitatis minui, si nimirum ad nubem certo gradu electrificatam virgae viciniorē altera minoris electricitatis accedit; ita enim sphaera actiuitatis contrahi debet. Tantum ergo abest, vt virga tali ratione electrificetur, vt potius magis recedat a virga causa electricitatis.

4) Tandem potest fortasse scintilla electrica in atmosphaera fulmen et tonitru generare, et sphaera actiuitatis nubis electrificatae tamen virgam non contingere, quo casu inter fulmina et tonitrua nulla electricitas obseruari poterit. An hoc interdum eueniat, afferere nondum audeo. (*)

(*) Post obseruationes d. xi. Iulii afferere audeo: dum 40. min. sec. inter fulmen et tonitru numerarem, et electricitas nulla obseruaretur, nubes electrificata tantum distare debuit a catena, vt radius eius actiuitatis ad catenam non perungeret.
